

## QUÆSTIO MEDICA.

Quodlibetariis Disputationibus manè discutienda in Scholis Medicorum die Jovis. i. Martii 1685.

M. FRANCISCO PICOTE' DE BELLESTRE, Doctore Medico, Præfide.

*An Medicinæ scientia ducit ad cognitionem Authoris naturæ?*

**M**EDICINA, potentissimorum olim Regum delicia, suisque clara perhonorificis titulis, à mundi cunabulis ortum repetit, agnoscitque pro sui parente Deum optimum maximum, à quo suum omne accipit decus atque auctoritatem: hæc ad calamitatem humanam sublevandam edita est, ibique tunc manus auxiliares admovet, ubi nulla dignitas, nec alia quæ maximo in pretio haberi solent, possunt opitulari: Id tamen habet commune cum bonis Principibus, ut bene faciat ac male audiat: Verum ab iis tantum despecta est, qui, aut eam non callent, aut qui eam leviter imbuti, perpaucæ balbutiunt: illa quippe est hominum generi pro summo beneficio concessa; vitam enim datam tuetur, fugientem retinet, morbos tanquam ejus hostes admodum insensos oppugnat, & sanitatem, ut bonorum omnium condimentum, corporibus & animis procurat, cunctis vitæ commodis præferendam: hæc à suis sacris rejicit *ajudices*, circumforaneos, impios votorum desertores, & alios ementito nomine Medicos, qui devium quoddam iter, & à concilio æquitatis & conscientia pererrantes, divinæ hujus scientiæ splendorem turpissimis artibus obstarant, quibus aliquando vulgus stupidum & imperitum credit, licet periculum sit in nullo mendacio majus, cum salutaris hæc disciplina, quæ non immerito perisque Sapientiæ pars, nonnullis ejusdem foror est habita, sui duntaxat legitimos cultores Philosophos agnoscat, adeo ut & morborum curatio & rerum naturæ contemplatio sub iisdem authoribus sit nata, truncaque & debilis Medicina censeatur absque ea naturæ rerum cognitione, unde non angustis terminis circumscripta tenetur, ut quæ occupatur circa rerum creaturarum universitatem, quarum facultates acriter investigat, ut quicquid ad salutem hominis, utilitatem & commodum referri potest, non perperam & perversè, sed rectâ viâ æquâque ratione in usum adhibeat.

**C**ERTE mirum est quantum luceat Dei præpotentis majestas in tanta operum quæ edidit varietate & multitudine, quæ Medicinæ navans operam diligenter speculatur; dum enim fursum vergit oculos, hos grato pascit spectaculo amplissimum cæli theatrum, tot sideribus conspicuum, quorum diversis maxime & ordinatos motus, variâque in hac sublimitate vires observat; ut ex Solis cæterorum principis accessu & recessu, vita ac interitus viventibus omnibus præsentissimè immittitur, ut in exoptatissimum telluris gremium infundit teporem suum æthereum, cujus foris salutari recreata, suas divitias parturit & in lucem profert, aëris quoque animabilem spirabilemque naturam expendit, vim illius adeo diversam & efficacem ad corpus immutandum, ut anni tempestatibus, ventis, cæli statu, locorum situ, crebras accipit mutationes; perfrutatur elementorum indolem, eorumque inter se concentum admirabilem, ut ex his quatuor tanquam ex primis principis corpora componuntur, summâ discordium qualitatum concordia, vapores quoque in nubes concretos, quique in pluviam resoluti terram fecundant, quam desinit nunquam mirari vestimentis arboribus, herbis, floribus, fructibus, frugibus, tum ad victum, tum ad medelam ægritudinum numero penè infinito ex ejus sinu prodeuntibus; animadvertit etiam quanta sit brutarum animantium varietas, & quantâ eam divina vis, ut in sua quæque genere permaneant, ut sensu & appetitu naturales pastus capellant, & pestifera fecerant à salutaribus; & subiens terræ viscera, lapides, mineralia, metalla respicit suis quæque prædita virtutibus, arumque inter ea magni apud quosdam in Medicina hominis, quod cordi conferat, licet veritati consentaneum sit, nullâ aliâ ratione esse cardiacum, quam quod possessoris animam exhibeat: nunquid ex iis, aliisque innumeris tam magnificis & tam sapienter institutum ordinem servantibus, prodit veritas etiam non quæsitâ, scilicet hæc cuncta Divini Numinis nutu ad salutem omnium conservationemque mirabiliter produci atque administrari?

**S**OLUS illius *Διμυρτης* vim admirabilem humani corporis compositio potentiùs prædicat, in cujus cognitione humanæ divinæque Philosophiæ principium continetur, quâ vix quidquam ornatus, quidquam aptius & perfectius potuit fabricari, in cujus contemplationem tanquam Medicinæ fundamentum totus Medicus incambens, ratione & oculis perlustrat miracula formationis fetus, nascendi modum incredibilem, turgescens statim à partu mammæ, quæ tanquam fontes nascentes albis & dulcibus fucis & sanguine genitis distenduntur ad fortis alimoniam; seriem eandem & ordinem membrorum, hominum formas in tot millibus discrepantes, externarumque partium justam & exquisitam proportionem, quantus earum lepos, quanta venustas, ut quælibet alteri cognatæ æquissimâ dimensione responderet, quam sunt mirabiles ossium commissuræ ad stabilitatem & penè omnem corporis actionem idoneæ; quam multarum artium ministræ manus, quibus artifices in rerum natura per institutiones arborum, aquarum ductus, aliæque quamplurima quasi alteram naturam efficiunt: Et abditiores corporis recessus ingrediendo, inspicit imprimis præcipua vite domicilia cor & hepar, sanguinis & spirituum vitalium officinas, naturalemque inter se earum partium conspirationem penetrat, mutuasque operas, ut toti corpori sanguinem & spiritus subministrant, omnium actionum instrumenta, sine quibus totum rueret opificium, nec vita posset constare: ut eadem & singulari Divini Numinis providentiâ, partes fordis in quatuor & fœdæ in locum imum velut in sentinam corporis relegatæ sunt, ne tetrus nidoribus cerebrum, principum facultatum sedem offundant, & in ejus substantia tanquam in arce regia puriores purgatiorisque spiritus animales caduntur sensui & motui actionibusque nobilioribus exercendis destinati, cujus divinæ partis elegantem fabricam, venarum artiarumque contextum, nervorum propagines & progressus toto corpore pertinentes, quis attentis cernens oculis non suspiciat? Universi demum corporis pars quælibet quantumvis exigua, sensibus tanquam incorrupis & integris testibus occurrens, veluti manu, ad Dei cognitionem ex qua oritur pietas, contuentes deducit, qui ad distinctionem cæterorum operum, non verbo, sed familiari manu opus illud admirabile concinnavit.

**Q**UONIAM vero corpus humanum, cujus partes inter se omnesartificio tam singulari consentiunt, animi gratiâ conditum est, nobilem hanc hominis partem, quæ ex magnorum virorum opinione totus homo est, seu quæ totum hominem constituit, esse quid præstantissimum ex tam illustri & splendido domicilio licet conjicere, cui tanquam dux & dominus præfectus est, ut vitam illius pulcherrimè gubernaret: Et quamvis utriusque varia sit indoles atque conditio, habent tamen quoddam commune vinculum, & tanta inter se societate connectuntur, ut quandiu animus alligatur corpori, nullas absque ejus commercio functiones administret: non tamen vitium est animi sed corporis, si nimia senectus fregit membra, si visus evanuit, si lingua torpuit, si auditus obscuruit. Cum autem ad animi naturam atque dignitatem attendit Medicus, eum quoque esse ejusdem pretii in utroque sexu, esse etiam principium functionum omnium quæ obveniunt in corpore, tacitus apud se cogitat, rationis eximio munere cæteris animantibus antecellere perhibetur, ferociore cicurat, suoque reddit obsequentes imperio; hoc lumine res incorporeas & ab omni materia segregatas complectitur, & quod maximum est, se ipsum videt, speculatur, intelligit; causarum & eorum quæ ex iis sunt, ordinem ac connexionem intuetur: & sicut arbor gravis fructibus satori curvatur suo, rivuli fontem suum agnoscunt & radii solem, sic hæc mentis dotes præclarissimæ, quibus eorum omnium quæ infra lunam sunt, nihil potest superius excogitari, suam sapientem originem, & veluti linguæ vociferæ compotes, Authoris divini potentiam, sapientiam ac bonitatem mirificè declarant.

**C**UM igitur per singulas mundi partes Dei majestas & sapientia splendeat, oculisque nostris hujus imago sese passim objiciat & inculcet, quam iniquus ille erga Medicinam Index temerè contendit, hujus Professores, curvas habere in terras animas & esse cælestium inanes, illos omnem succum impietatis inhæbere, rerumque omnium causas & effectus soli naturæ ascribere, calumniosè judicat, quasi verò rebus philosophicis & medicis addiditissimos fugiat discrimen quod intercedit inter *τὸ θεῖον* & *τὸ γερήμαρον* divini Platonis, eosdemque lateat, quantum servus à domino discrepet, quantum effusus à causa, quam sit finita naturæ potentia, ut sui dissimilia nequeat effingere, Deique simulâ & sinistra audiat. Quoniam vero nulla est gens tam fera, cujus mentem tacito naturæ impulsu non imbuerit divini Numinis opinio, & innatus sit omnium hominum animis religionis sensus, scientiâ Medicinæ non parum intenditur atque confirmatur, quæ ubique Deum videt, & quasi manibus ipsis, (si ita dicere fas est) attrectat; illius plena esse omnia percipit, quem insuper stabilis ordo siderum enuntiat, circumscripti mari fines declarant, aëris vastitas & utilitas prædicat, admirabilis corporis compages, animi nobilitas & perfectio, utriusque nexus & conjugium manifestant, quicquid demum gignit & in se continet terra, Deum spirat, testatur, loquitur, eumque auctorem esse rerum omnium naturalium tam aperte demonstrat, ut omnino constet posse reperiri neminem, qui ex tot stupendis operibus, sibi potissimum Medicinæ lumine perspectis atque intellectis, ad hujus cognitionem & venerationem non rapiatur.

*Ergo Medicinæ scientia ducit ad cognitionem Authoris naturæ.*

DOMINI DOCTORES DISPUTATURI

M. Ioannes Cordelle.  
M. Petrus Yon.  
M. Antonius de Saint Yon, Medicus Regis ordinarius.

M. Ioannes Robert.  
M. Ludovicus Gayant, Medicus Regis ordinarius.  
M. Franciscus Vexier.

M. Tessanus Fontaine, Professor Regius.  
M. Franciscus Pajot.  
M. Nicolaus Richard.

Proponebat Parisiis FRANCISCUS POITOU, Viriënsis, Baccalaureus Medicus. A. R. S. H. 1685.

